



Kinderhüeti

Jahresbericht Jungmütterzirkel 2024

Guätä Abig midänand

Jedä 2. Zischtig-Namittag organisierid miär vom Jungmütterzirkel ds Kinderhüeti. Abum 13.30 dörfid di 3-4 jährigä Buäbä und Meitli jewils is Ffürwehrlokal cho. Det sind dä 2 vo üs Mamis wo mit inä tönd Büächli aluägä, Spilä und Bastlä. Übers Jahr hemmr au spezielli Hüeti-Namittäg we z. B. Fasnacht womr üs dönd vrchleidä und schminkä, Ostere, mr bastlid öpis fürä Muättertäg, odr mr gönd i Wald odr ufä Spielplatz gu d Natur erkundä. Vilich gids ja undr üch öpr wo Lust hed, 1x pro Monäd mit Chind gu spilä und bastlä, äs darf au dr Dädi odr dr Grosdädi cho. . Im Summer verlönd üs 2 Mamis, drum simmr dringend uf Unterstützig agwisä, dasmr z Kinderhüeti witerhin chönd abiätä.

Bi üs im Jungmütterzirkel heds idä vergangänä Mönäd grossi Veränderigä gäh.

So hend miär Anfang letscht Jahr erfahre, dass ä 5. Kindergarte gid und somit d Psychomotorik ä nüä Ruum suächt und gärä i üsä Hüeti-Ruum im Musiktreff wett. D Schuäl hed üs sehr guät unterstützt bim suächä. So hend si schlussendlich im Theorieruum vom Ffürwehrlokal Platz für üs gfundä. Miär hend lang überleid und wäg witrä Rümlichkeitä umägluägt wils nümme so zentral im Dorfkern isch. Wes äso isch, heds nüd viel passendi Rüm wo au üsi Spiel- und Bastelsachä platz hend. Schlussendlich hemmr diä Möglichkeit dankbar agnuu und freuid üs, dass miär so adä Steiner-Chind witerhin ä Kinderhüeti Nachmittag chönd abiätä.

Dänn isch los gangä mit Ussortiere und Umzug planä. Zudem hed üs Gmeind Schränk organisiert, dass miär üsi Spiel- und Bastelsachä chönd vrrumä. Au äs Gländer für d Chind und äs Törli obä adr Stägä isch vodr Gmeind organisiert wordä. Im Summr hemmr dä üsi Sachä is FÜRwehrlokal apä zügläd. Ä wiiteri Veränderig isch gsi, as üs langjährigi Hüeti-Frauä verlah hend, dur das isch üsers Team stark gschrumpft.

Schiär alli Chind wo vor dä Summerferiä is Kinderhüeti cho sind, sind i Kindergartä cho, drum hemmr midmä chlinä Grüppli vo 3-4 Chind im August 2024 am nüä Standort gstartäd. Mittlerwilä sind immer meh nüi Gsichter drzuä cho und so hemmr aktuell ca. 8 Chind amä Hüeti-Namittag. Au im Hüeti Team hemmr Unterstützig übercho dur d Maria Betschart. Nüb dr Maria und miär sind nu d Carmela Lindauer, d Severina von Euw und d Nicole Grassi im Team vom Jungmütterzirkel. Da miär aktuell nur 5 Mamis sind, hemmr anstatt jedi Wuchä, all 2 Wuchä am Zischtig-Namittag Kinderhüeti. Au im August wärdid üs Mamis verlah. Drum suächäm 5 Personä wo üs ab Endi August unterstützid, dasmr widr all 2 Wuchä chönd Kinderhüeti abiete.

Das isch so ds spannendschti gsi vom Jungmütterzirkel. Ich danke vielmal fürs zuälosä und wüschä üch nu ä churzwiligi GV.